



Luxembourg, le 16/04/2020

REÇU
Par Christine Wirtgen, 14:12, 17/04/2020

Service central de législation
Monsieur Marc Hansen
Ministre aux Relations avec le Parlement

Objet : Question parlementaire n°1995 – Réponse

Monsieur le Ministre,

J'ai l'honneur de vous communiquer en annexe la réponse à la question parlementaire n°1995 tout en vous priant de bien vouloir en assurer la transmission à Monsieur le Président de la Chambre des Députés.

Recevez, Monsieur le Ministre, l'expression de mes sentiments distingués.

La Ministre de l'Environnement, du Climat
et du Développement durable,

Carole Dieschbourg

Äntwert vun der Ministesch fir Ëmwelt, Klima an nohalteg Entwécklung, dem Minister fir Mobilitéit an ëffentlech Aarbechten an dem Tourismusminister op déi parlamentaresch Fro n°1995 vum 11. Mäerz 2020 vum éierbaren Deputéierten Här Marc Goergen iwwert de Stauséi

1. *Dir Dammen an Här Ministeren, wéini steet deen nächsten groussen Entretien vum Stauséi un, wou de Stau muss auslaffe gelooss ginn?*

Momentan ass keen Auslaffe vum Stau am Kader vun Entretiensaarbechte virgesinn. Et wäert awer eng „Inspection décennale“ stattfannen, bei där den Zoustand vun der Staumauer, inklusiv d'Elementer ënner Waasser, wäert kontrolléiert ginn. Dës Kontroll wäert also, ewéi och schonn am Joer 2012, ouni Vidange vum Barrage erfollegen. Den aktuelle Planning gesäit fir dass dës Aarbechten am Laf vum Joer 2023 solle stattfannen.

2. *Mat wéi enge Käschten rechent Dir an deem Zesammenhank a mat wéi engen gréisseren Aarbechten ass an deem Kontext ze rechnen?*

Well esou Kontrolle just all zéng Joer stattfannen ass et schwier, d'Käschte fir dës Moosnam anzuschätzen. Den Ëmfang vun den néidegen Aarbechten un der Staumauer wäert eréischt duerch d'„Inspection décennale“ festgestallt ginn.

3. *Madamm Ministesch, wéi gedenkt Dir an der Iwwergangsphase wou de Stau eidel wäert sinn, d'Drénkwaasserversuergung weiderhin ze assuréieren?*

D'Eventualitéit dass d'Drénkwaasserversuergung duerch Stauséiwaasser géif ënnerbrach ginn, ass mat an der Strategie zur laangfristeger Ofsécherung vun der nationaler Drénkwaasserversuergung consideréiert ginn. Den Drénkwaasserversuenger SEBES kann elo schonn op Noutléisungen zrückgräifen. Ab dem Moment wou déi nei Anlag fäerdeg ass, besteet engersäits d'Méiglechkeet Waasser aus der Sauer ënnerhalb vun der Staumauer ze prelevéieren. Op der anerer Säit ginn et 4 Standuerter am Land wou Grondwaasser duerch Déifbuerungen ka gepompelt ginn. Déi kuerzfristeg Kapazitéiten vun 2 vun deenen Standuerter sollen deemnächst erhéicht ginn. Strategie vun der laangfristeger Ofsécherung vun der nationaler Drénkwaasserversuergung baséiert op 3 Standbeen.

I. De Schutz vun der Drénkwaasserqualitéit duerch Ausweisung an Ëmsetzung vun den Drénkwaasserschutz zonen. Zënter 2013 goufen 55 Projeten vu groussherzogleche Reglementer op den Instanzewee bruecht, wat ongeféier 90% vun den Drénkwaasserressourcen entsprécht. De Schutz vun dësen Ressourcen ass äusserst wichteg well aktuell Drénkwaassererfaassungen (Quellen, Buerungen) déi ronn 75.000 Leit versuergen kéinten ausser Betrib sinn wéill d'Waasser mat Rëckstänn vun Ofbauproduiten (Metaboliten) vu Planzeschutzmëttel an Nitrater belaascht ass.

II. Notzung vun bisweilen net genotzten Ressourcen. Prioritéit läit hei op der Opbereedung vu Muselwaasser, souwéi Recherchen no Grondwaasserreserven an der Ëmgéigend vum Attert- an Warkdall.

III. Spuerstrategie fir den Waasserverbrauch pro Awunner a pro Kapp ze reduzéieren.

4. *Dir Dammen an Här Minister, ass geplangt no Drénkwaasserreserven am noen Ausland ze sichen, fir där héijer Demande vum Grand-Duché an Zukunft gerecht ze ginn?*

Et ass prioritär déi national Drénkwaasserversuergung zu Lëtzebuerg net vu Reserven aus dem Ausland ofhängeg ze maachen. Dofir gëtt sech op d'Sich vun zousätzlechen Reserven hei am Land konzentréiert.

5. *Madamm Ministesch, geet Produktiounskapassitéit vum Stau a Saachen Drénkwaasser, wann Bevölkerung wieder wiist, duer? Bis weini géifen déi aktuell Kapassitéiten, bei gleichbleiwendem Wuesstem, duer goen?*

D'Produktiounskapazitéit vum Stauséiwaasser hänkt staark vun der Waasseropbereedungsanlag vum Drénkwaasserversuerger SEBES of. Des Anlag gëtt bis Enn 2021 komplett erneiert an op Eschduerf verluecht. Wann dës Anlag bis fäerdeg ass, wäerte Produktiounskapazitéiten vu ronn 72.000 m³/Dag op 110.000 m³/Dag eropgeschrauft ginn. Och wäert d'Opbereedung vum Réihwaasser vill méi performant sinn (z.B. Erausfilteren vu Mikrospuerenstoffer). Déi 3 Standbeen vun der Strategie fir déi laangfristeg Ofsécherung vun der Drénkwaasserversuergung (Äntwert op Fro 3) müssen bis spëtstens 2040 ëmgesat ginn. Et ass warscheinlech dat an Zäiten vum Spëtzenverbrauch (z.B. no längeren Hëtztwellen) lokal an regional Kapazitéiten schonn an den nächsten Joren kennen zäitweis iwwerschritt ginn.

6. *Ass geplangt, Madamm Ministesch, d'Drénkwaasserproduktioun an d'Luucht ze schrauwen? Wa jo wéi, vu wéi engem Volume géife mir do schwätzen?*

No den aktuellsten Zuelen misst Drénkwaasserproduktioun bis 2040 em eng Gréissenuerdnung vun 40.000 m³/Dag am Verglach zu den Kapazitéiten déi Land wäert Enn 2021 (Fäerdegstellung vun der neier Opbereedungsanlag SEBES zu Eschduerf) an Luucht goen. Des Zuel kann awer signifikant ofhängeg vun verschiddene Facteuren schwanken. Niewent dem Impakt vum Klimawandel hänkt et virun allem och dovunner of ewéi konsequent Moosnamen an den Drénkwaasserschutz zonen an Aspuren vum Waasserverbrauch ëmgesat ginn. Awer och dervun of ob zousätzlech grouss Verbraucher (zum Beispill Industrie, Landwirtschaft) géifen derbäi kommen die relativ groussen Bedarf un Waasser géif mat sech bréngen. Eng konsequent Ëmsetzung vum Waasserschutz een nohaltegen Verbrauch vum Waasser bedeuten en manner groussen Volume vun zousätzlechen Reserven deen gebraucht gëtt. Dës ass eng Prioritéiten fir Regierung.

7. *Um Stau gëtt och duerch Waasserkraaft Elektrizitéit produzéiert. Wat huet dës fir en Afloss op den Volume vum produzéierten Drénkwaasser? Gëtt duerch d'Produktioun vun Elektrizitéit de Volume u produzéiertem Drénkwaasser beanträchtegt?*

Säit 2003 existéiert en Accord tëscht dem Lëtzebuerger Staat an dem Produzent vun der Elektrizitéit, deen d'Notzung vum Stauséi duerch festgesate Grenze limitéiert. Enner anerem sinn do minimal a maximal Niveauen vum gestaute Waasser festgehalen, an och soll garantéiert ginn dat nach en Mindestabfluss un Waasser aus dem Stau erausfléisst. Am Joer 2019 gouf mat allen concernéierten Acteuren ënnert der Leedung vun der Waasserverwaltung (AGE) ee „Plan de gestion Barrage Lac de la Haute-Sûre“ opgestallt, den et zu all Moment erlaabt z'evaluieren, ob de verfügbare Volume allen Besoine gerecht gëtt an wann net, wou d'Prioritéiten musse geluecht ginn. Domadder soll souwuel Versuergung mat Drénkwaasser wéi och eng gutt Waasserqualitéit vun der Sauer hannert der Staumauer garantéiert ginn.

8. *Här Minister, ass säitens dem Tourismusministère geplangt weider Attraktiounen an d'Stauséi-Géigend ze bréngen? Wa jo, wéi eng?*

Den Tourismusministère ass net de Projektträger vun eenzelen touristesche Projekte mee ënnerstëtzt notamment via den 10. Programme quinquennal vun den touristeschen Infrastrukturen („Loi du 1er août 2018 ayant pour objet d'autoriser le Gouvernement à subventionner l'exécution d'un dixième programme quinquennal d'équipement de l'infrastructure touristique“) all touristesch Initiativen. An dësem Kontext goufen eng „Extension et modernisation des infrastructures du centre récréatif du Lac de la Haute-Sûre“ an den „Aménagement d'une aire de jeux aquatique“ als eligibel

zeréckbehalen. Zousätzlech kann iwwert d'Tourismus-Direktioun all „Aménagement et modernisation d'infrastructures et acquisition d'équipements de sports-loisirs“ um Stauséi subventionéiert ginn.

9. *Här Minister, wéi sti Dir zu der Iddi vun enger Hängebréck beim Stauséi, ähnlech wéi där vun der „Hängeseilbrücke Geyerlay“? Géift Dir esou eng Attraktioun finanziell ënnerstëtzen?*

Bis elo huet nach kee Projektträger sech offiziell un de Ministère adresséiert fir esou ee Projet ëmzesetzen. Esou ee Projet kéint interessant fir den Tourismus sinn, mee opgrond vun der primärer Vocioun vum Stauséi kann esou ee Projet just da subventionéiert gi wann all Legislatioun am Beräich vum Ëmwelt- a Waasserschutz respektéiert gëtt, fir der genannter primärer Vocioun, nämlech d'Drénkwaasserproduktioun um Stauséi, net ze schueden.

10. *Dir Dammen an Häre Ministeren, ass geplangt d'Geschicht vum Duerf wat deelweis ënnert dem waasser vum Stau versenkt gouf, sou wéi déi eenzegaarteg Flora a Fauna vun der Géigend fir Touristen an Intresséierter, duerch konkret Projeten en Valeur ze setzen?*

Den Tourismusministère huet bis dato keen esou ee Projet virleie mee all Projet deem eng touristesch Opwäertung, respektiv eng Plus-value fir den Tourismus duerstellt, gëtt vum Tourismusministère begréisst a kann iwwert de Programme quinquennal ënnerstëtzt ginn.